

元豐類藁

十七



元豐類藁卷第三十二

劄子



論中書錄黃畫黃舍人不書檢

臣初掌書命中書吏以錄黃畫黃并檢赴臣簽書其檢中書舍人稱臣書名而侍郎押字至錄黃畫黃然後侍郎舍人皆稱臣書名臣曾巡廳言檢草舍人稱臣書名而侍郎押字恐於理未安自後舍人遂不書檢惟書錄黃畫黃而已然恐於理尚有未盡且錄黃畫黃并檢一體相湏而成當書之官未有可以一書一否也况錄黃畫黃侍郎舍人皆稱臣書名者事君之體固然也其檢舍人不書欲以為別異執政乎則錄黃畫黃并檢一體相湏而成事君之體於例當一書之間方其嚴上則未有可以復伸下也伏尋故事中書舍人分押尚書六曹天下眾務無不關決其各執所見謂之五花判事故唐太宗嘗謂侍臣曰中書門下機要之司詔勅有不便者皆湏執論比來遂無一言駁論若准書詔勅行文書而已人誰不堪今舍人不押六曹惟掌書命而事干書命者又不書檢竊尋故事未有可據而然也或謂事干書命者有除改行遣因依故舍人不當書檢然向來書檢已連除

改因依况除改因依參於典故即無舍人不得預聞之理臣詳本朝之制官司佐屬蓋有得書檢而不得書行移文字者未有得書行移文字而不得書檢者此又於理可疑臣固非欲書檢也顧緣職分不敢苟止伏乞攷詳理體斷自聖裁令臣得以遵守取進止

元豐五年七月

請給中書舍人印及合與不合通簽中書外省事

臣檢會中書外省昨准門下省連到詳定官制所狀內事件有合申明下項

元豐五年

卷之十一

二

奇

一檢會官制所元豐四年十月七日上殿劄子元擬門下省印給事中印奉聖旨門下省印尚書省印門下給事中印中書舍人之印尚書列曹別具攷定取旨餘兩省官并省務並用給舍印臣今看詳通進司文字既隸給事中合使門下給事中印

一給事中廳狀勘會請到門下外省印未委合於何處收掌

臣今看詳上件印合係散騎常侍收掌如闕則以次官

一給事中廳狀四月二十九日准詳定官制所發到狀二件爲分撥人吏并院子事各係申門下外省今來未審係是何官書判施行

臣今看詳應申門下外省文字合係本省散騎常侍以下通簽書

一狀後門下外省批已施行外五月六日送中書外省施行訖即却繳送合屬去處

臣今看詳逐項事件並只是指揮門下外省及給事中廳其中書外省雖准批送施行即未有定制中書外省及舍人廳事務明降指

揮兼官制所狀內一項稱兩省官并省務並用給舍印又一項稱門下外省印合係散騎常侍收掌如闕即以次官是則中書舍人及中書外省各合有印今來已有中書外省印其中書舍人之印即未給到未應得官制所狀內元定指揮及右省官除逐廳各有分職外其外省事務見今中書舍人與起居舍人通簽若將來常侍以下至正言員足消與未消逐一通簽如不通簽即未審合係是何官書判施行如合通簽亦乞明降指揮

右取進止

貼黃今後因逐司申明立法有與別司事體相同者乞令便據逐司事務立條貴免更有申請重煩聖聽兼免逐司事體相同施行不一如允臣所奏乞立此條令今後應干修條處並依此又舍人諫官舊各有印蓋緣本職文字慮有事干機密難就別官用印故事中書舍人判省雜務

議邊防給賜士卒只支頭子

臣伏見真宗議封泰山問三司使丁謂隨駕兵士或遇泥雨支賜鞋錢動湏五七萬貫如何有備謂奏隨

駕之士披帶已重若有支賜如何將行欲令殿前都指揮使曹璨先問軍士路中或有支賜置隨駕便錢一司各與頭子支便於兵士住營處或指定州軍各使骨肉請領一則便於兵士請領二則隨駕兵士骨肉在營得便到特支錢物甚安人心曹璨尋問諸軍皆曰隨駕請得何用兼難以將行若如此皆感聖恩遂定東封之計車駕往回略無闕誤臣竊以謂邊防給賜士卒可推此行之在公可省輦運在私可無負致營護之勞而士卒之家又速得錢物濟用伏乞詳酌如有可采出自聖意施行取進止

申明保甲巡警盜賊

不曾上在

臣伏以周禮以五家爲比使之相保推之至於五州爲鄉因其民以用之於田役追胥之事管仲於齊亦以五家爲軌推之至於五鄉爲軍以有三軍之制蓋生民之業資於衣食則爲農資於備禦則爲兵其所恃之理然也後世言兵者以謂九夫爲井此八陣之法所由出也五家爲軌此師旅之法所由出也以臣考之所以然者非三軍之政取法於鄉田蓋古者生民之業兵農非異務也自經界旣廢而兵農始殊秦漢之際大率十里一亭亭有長十亭一鄉鄉有三老有秩嗇夫游徼三者掌教化嗇夫職聽獄訟收賦稅游徼循禁盜賊亦比閭族黨卒伍追胥之遺事也今保甲之制自五家爲保推之至於有大小保長有都副保正職承文書督盜賊與比閭有長鄉亭有嗇夫游徼非異意也臣昨守亳州亳爲多盜重法之地臣推行保甲之法以禁盜賊幸不至繆矣誠不自揆欲於保甲巡檢縣尉之法所以防慮盜賊者有所推廣以稱朝廷立法之意具下項

一諸處自來盜賊並是外來浮浪行止不明之人或是本處素來無賴之人保甲之法使五家爲

保蓋欲察舉非違之事一保五家若有一家藏  
匿外來浮浪行止不明之人或一家有素來無  
賴之人即四家無由不知而法禁之中不責其  
顏情蓋莖則人於鄉里誰肯告言若爲設禁防  
使不告官者因事發露則有相坐之刑人情自  
愛誰肯苟容此乃本立保伍察非違之意也所  
察舉者藏匿惡人之家所以爲人除患固非開  
告訐之路傷隣里之義也若藏匿之家自不能  
揜則惡人何所容入盜賊不禁而自熄理之所  
可必也欲乞指揮外來浮浪行止不明之人保

內不得舍止本處素來無賴之人保內須以姓  
名申官官爲籍記係籍之人凡有出入並須告  
知本保若保內舍止外來浮浪行止不明之人  
犯人嚴斷同保不糾科不言上之罪保內有本  
處素來無賴之人同保不以姓名申官及係籍  
之人出入不告本保本保不糾亦並科不言上  
之罪犯人嚴斷所貴有所關防可以暗銷盜賊  
况自夾州縣亦徃徃有禁絕舍止浮浪及籍記  
惡人之處可以斷得盜賊別無擾煩兼保甲條  
諸保內有外來人如行止顯有不明即收領送



官則是法意蓋已及此今來所乞只是申明更欲詳備伏乞裁酌施行

一伏見熙寧六年保甲條法保內如遇有賊盜畫時告報大保長已下同保人戶即時前去救應追捕如入別保即遞相擊鼓應接襲逐元豐二年詳定上條節文諸保內賊盜畫時集本保追捕如入別保遞相告報襲逐

舊有鋪屋及鼓處依舊仍輪保丁守

宿未有處願置者聽

臣竊以謂元條及詳定互有詳略若

合而用之則彌綸之意無所不備今欲乞指揮諸保內賊盜畫時集本保追捕如入別保即遞相擊鼓報應襲逐並置鋪屋及鼓仍輪保丁巡宿如此則保伍之內既不得容止惡人巡宿之法又備如有賊發則合力追捕措置無所不盡於本置保甲之意委曲備具亦古者井田守望相助後世置鄉亭徼循盜賊之遺法也

一伏見熙寧勅節文諸巡檢常於地分內巡警解宇所在州給與印曆逐季點檢臣欲乞相度指揮重法地分巡檢縣尉常於地分內巡警每旬具所到地分申州仍給與行程印曆每季本州將旬申與印曆委官點磨違者取勘施行州不

督察監司按劾以聞如此則制置捕盜之官事體均一理在必行不容苟簡之人得以廢法使捕盜之官分巡不止保甲候望轉相承接盜賊所向輒遇譏察竊發之謀必自衰熄或有伺間不逞之人亦易敗獲右取進止

存恤外國人請著為令

不曾上

臣昨任明州日有高麗國界託羅國人崔舉等因風失船飄流至泉州界得捕魚船援救全度從此隨捕魚船同力採捕得食自給後於泉州自陳願來明州候有便船却歸本國泉州給與沿路口券差人押來

臣尋為置酒食犒設送在僧寺安泊逐日給與食物仍五日一次別設酒食具狀奏聞臣奏未到之間先據泉州奏到奉聖旨令於係官屋舍安泊常切照管則臣存恤舉等頗合朝廷之意自後更與各置衣裝同天節日亦令冠帶得預宴設竊以海外蠻夷遭罹禍亂漂溺流轉遠失鄉土得自託於中國中國禮義所出宜厚加撫存令不失所泉州初但給與口券差人徒步押來恐於朝廷矜恤之恩有所未稱檢皇祐一路編勅亦只有給與口食指揮今來聖旨令於係官屋舍安泊常切照管事理不同緣今來所降聖旨

未有著令欲乞今後高麗等國人船因風勢不便或有飄失到沿海諸州縣並令置酒食犒設送係官屋舍安泊逐日給與食物仍數日一次別設酒食闕衣服者官爲置造道路隨水陸給借鞍馬舟船具析奏聞其欲歸本國者取稟朝旨所貴遠人得知朝廷仁恩待遇之意取進止

### 請減軍士營教

臣伏見諸軍教閱之法並只合早教一次舊例有晚教者即更晚教向來教閱之法初行之時諸軍欲要訓練早得精熟是以早晚教外諸營更有營教今來訓練日久各以精熟甚有踏硬出格之人諸軍事藝見今分作三等欲乞相度其事藝在第三等者與免營教一日在第二等者與免營教二日在第一等與免營教三日所貴人情悅慕升進得事藝者多乞賜詳酌指揮取進止

### 代曾侍中辭轉官劄子

臣蒙恩轉官已曾面陳及具劄子辭免懇誠雖切志願未諧夙夜省循不皇寧處是用再干旒宸伏望必賜允從臣以謏材當陛下即政之初勵精思治與在廟堂首當大任所宜佐陛下循守法度重惜名器使

恩無誤施官不虛授四方觀聽知朝廷慶賞得宜則衆情必皆勸慕欲正其本當始於臣今若首玷寵榮不知固避使朝野竊議上虧政理則是欲清其流而先濁其源致弊之由乃自臣始豈陛下所以屬任微臣之意愚情所以圖報萬一之心况祖宗以來進官之法或以歲月或以功勤今於斯二者實無其一又於執政之內不爲以事當遷欲貪厚恩何義而可伏望特回聖慈俯憐惻迫速賜德音遂其所乞至於國公戶邑則臣更不敢辭謹具劄子奏陳無任赤心懇激之至取進止

代曾侍中乞退劄子

臣近三上表及再進劄子以陰陽不調雨雪愆候乞欲免黜蒙面諭不允仍降批荅令斷來章臣仰惟寵遇之厚恩旨之嚴固欲強顏趣於順命然信宿以來旱氣轉甚臣夙夜震惕職思其憂所以不避冒煩至於五六敢祈仁聖必賜矜從此臣區區之愚義不得止者也蓋宰相職調陰陽災異即當罷免行之已久故事甚明今亢陽爲沴經涉冬春隴畝之間焦枯日甚閭巷之內疾癘將興天戒丁寧各自臣始陛下側身思變發於懇誠忘已憂人見於顏色以至詢訪周

於列位請禱徧於羣神聖心焦勞中外嗟仰豈臣之分尚得晏然雖陛下大恩欲終覆護而四方觀聽責當謂何且臣少壯之時尚虞不職今齒髮已暮理當乞身欲貪寵私何義而可伏望察臣素守體臣至誠早回聖慈許從罷黜矧今舊德之老新進之賢求於朝廷所在森列取以代臣必致休證使臣得避賢者路退守丘園豈惟上厭天心下塞人望亦所以全陛下始終之恩成老臣去就之義况應天感人惟在誠實臣既知當退豈敢矯誣所望睿明審加詳擇臣無任血誠迫切之至取進止

英宗實錄院申請

奉勅修撰英宗皇帝一朝實錄伏以先帝功德之美覆被天下宜載方策傳之無窮而未有日曆至於時政記起居注亦皆未備今此論次實憂踈略其於搜訪事迹以備撰述尤在廣博使無闕遺今取到修撰仁宗皇帝實錄院行遣案卷看詳彼處累次陳請乞搜採取借應干合要照證文字前後條件本院亦合如此施行參詳類次作一併申請具下項

一文臣少卿監以上武臣正刺史以上或雖官品未至而事業勲績可書及丘園之士曾經朝廷

獎遇凡在先朝薨卒者例合於實錄內立傳欲  
乞朝廷特降指揮下鈐轄諸道進奏院通行指  
揮仍劄付御史臺開封府及審官院三班院流  
內銓入內內侍省閤門出榜曉示應係英宗朝  
亡歿臣僚合立傳者並令供納行狀神道碑墓  
誌等仰本家親屬限日近修寫疾速附遞繳納  
赴實錄院

一應先朝曾歷兩府兩制雜學士待制臺諫官及  
正任刺史閤門使已上臣僚或因賜對親聞聖  
語或有司奏事特出宸斷可書簡冊者並乞付  
中書遍劄送已上臣僚委令逐人速具實封供  
報務要詳悉仍乞指揮進奏院遍行指揮應曾  
在先朝任上件官位已經亡歿臣僚之家亦許  
親族編錄經所在官司繳進不得虛飾事節候  
到日並降付本院以憑看詳編修所貴書成之  
日免致疏略

一乞下中書樞密院自嘉祐八年四月至治平四  
年正月已前應有臣僚進獻文字曾送史館或  
留在中書剗刷名件及下史館盡底檢尋降付  
本院并宰臣與文武百僚凡有奏請稱賀上表

所降批荅亦乞檢尋降下

一乞下兩省及司封兵部吏部甲庫學士舍人院據實錄院所闕宣勅及詔書除目告詞如移牒暫借使畫時檢尋報應不得稽緩

一乞下禮賓院具自嘉祐八年四月至治平四年正月八日已前凡外蕃朝貢所記本國風俗人物道里土產詳實供報

一先朝臣僚有得罪譴謫者乞下御史臺審刑院刑部大理寺據實錄院所要案牘畫時供借

一乞下司天監自嘉祐八年四月至治平四年逐年具曆日一本供報當院

一乞下三司令自嘉祐八年四月至治平四年正月八日已前應蟲蝗水旱災傷及德音赦書蠲放稅賦及蠲免欠負並具實數供報當院

一乞下三司自嘉祐八年四月至治平四年正月八日已前應有制置錢穀稅賦茶鹽及推酒等凡干臣僚章疏論議廢置事件具錄供報當院一部水監河渠水利凡有論議改更禮部但係郡國所申祥瑞貢院但干改更貢舉條制太常寺禮院但干禮樂制作事三司戶部每遇戶口陞

降已上官司自嘉祐八年四月至治平四年正月八日已前令子細檢尋供報本院不得漏略一天聖元年管勾修真宗皇帝實錄所奏修撰官李維等公文其間有事迹不圓處合係中書樞密院三司檢尋應副又緣事件不少竊慮差去手分不得到裏面檢尋是致逐時不檢到照證事件乞傳宣中書樞密院據李維等合要照證修撰事迹名件令合行手分等盡底檢尋應副免致有妨修撰奉御寶批依奏治平元年修仁宗皇帝實錄院亦奏合於中書樞密院檢尋合

宋三二二

一四

方

要照證事件乞依天聖初體例施行并乞差中書應奉國史文字堂後官魏孝先樞密院修時政記主事劉孝先候見當院書庫官等將到合要檢尋事件立便接收檢尋應副又曾乞差中書樞密院編文字官及乞於三司審刑院大理寺屬官內選差一員各令應副檢尋文字今來本院合要中書樞密院檢尋文字照證編修欲乞依天聖治平初體例施行

一乞下管勾往來國信所契勘嘉祐八年四月至治平四年正月末以來所差入國接伴館伴官



等正官借官簿等冊并語錄權借赴當院照證  
修纂仍不妨彼所使用

一乞下玉牒所取英宗皇帝玉牒一本照會

一乞下中書編機房合要嘉祐八年四月至治平

四年正月八日已前除改麻制文字照會

一本院但干修實錄於諸處檢借文字並須當職  
官員封記往還疾速應副

一乞下尚書司封疾速檢借嘉祐八年四月至治  
平四年正月八日已前中書除改百官官位姓  
名勅黃照證修纂

元豐類藁卷第三十三

奏狀

進奉熙寧四年明堂綰狀

祀而嚴配王國之上儀助者駿奔人臣之常奉前件物實之用篚旅以造庭阻就列以陪祠庶將心於拱極載循僭冒伏積震惶

進奉熙寧七年南郊銀綰狀

天休不宰故大報於親郊上德難名唯駿奔於助祭茲爲邦禮以合人情前件物輒用土毛敢叅庭實第從臣之嘉頌獨遠清光得萬國之歡心庶將薄意干冒旒宸臣不任

進奉熙寧七年同天節銀綰狀

自天生德與世爲歸屬當載育之期敢薦無疆之祚前件物輒備土毛之末用叅篚貢之餘遠守蠻荆莫預造庭之會仰懷象魏但祈難老之祥

進奉熙寧八年同天節銀綰狀

元命在躬方啓龍興之運鴻圖集祉爰開馭降之祥前件物敢薦服官用叅庭實緣易供之薄獻祝難老之殊祥

襄州乞宣洪二郡狀

右臣今任至今年九月成資已蒙差太常少卿孫頌  
替臣成資闕今臣去替祇有數月竊念臣為有私便  
欲乞就移洪州或宣州一任情願守待遠闕謹具狀  
奏聞伏候勅旨

奏乞回避呂升卿狀

右臣伏奉勅命就差權知洪州軍州事充江南西路  
兵馬都鈐轄已發來赴任次今覩呂升卿授江西轉  
運副使伏緣臣先任齊州得替後呂升卿為京東路  
察訪於齊州多端非理求臣過失賴臣無可掇拾兼  
臣弟布與呂惠卿又有嫌隙二事皆中外共知今升  
卿任江西監司洪州在其統屬須至陳乞回避伏乞  
指揮檢會臣先奏乞移洪州或宣州或東南一般州  
郡臣為母親見在饒州迤邐前去饒州伺候朝旨

奏乞與潘興嗣子推恩狀

右臣伏覩本州人試將作監主簿潘興嗣五歲以父  
任得官二十二歲授江州德化縣尉不行熙寧二年  
朝廷察其高以為筠州軍事推官不就今年五十六  
歲安於靜退三十餘年臣竊以康定中徐復以處士  
收用辭不就得官其一子近王回孫作皆以幽潛見  
錄命下而回已死亦得官其一子李覲以國子直講

退歸死十年亦得祿其後則國家之於激獎廉退既肆其所守又恩及其世蓋有故事今與王回同時見錄之人有孫侂而後又有興嗣處幽不改其操皆已白首然未有爲上聞者故其子獨未蒙恩竊以康定至今幾四十年士之抗志於隱約而爲朝廷所知者止此數人蓋枯槁沉溺其守至難故其人至少爲國家者取而顯之使天下皆知士之特立無求於世者不爲上之所遺則自重者孰不勉浮競者孰不悔可謂施約而勸博寵祿之所以勵世其實在此臣故敢以聞伏惟陛下幸察侂及興嗣躬難進之節遭遇聖時用王回徐復李覲爲比加恩其子使斯人不卒窮於閭巷足以明示天下興嗣有子羣年二十六歲孫侂今家真州謹具狀奏聞伏候勅旨

奏乞復吳中復差遣狀

右臣伏見提點本州玉隆觀龍圖閣直學士給事中吳中復年六十六歲精力未衰志意甚壯歷事累朝嘗任諫官御史以直道正言能稱其職又任邦伯理兵治民皆有可紀孔子曰如有所譽者其有所試矣如中復之才有已試之効可謂明白方今中外任使嘗患乏人如中復者豈可遂其閑逸欲乞召至左右

使典司獻納或委以藩鎮使剗治煩劇必能上副  
勤不負委任况中復年未當退又無疾病處之散地  
衆謂非宜伏望早賜收用以稱朝廷尚賢求舊之意  
臣忝任州長不敢不言謹具狀奏聞伏候勅旨

辭直龍圖閣知福州狀

右臣準洪州送到勅牒一道授臣直龍圖閣就差權  
知福州交割本職公事與以次官員發赴本任者孤  
遠之臣幸蒙收擢聖恩深厚詎豈敢辭伏念臣老母  
年高近歲多病臣弟布已移知廣州見赴本任臣若  
更適閩越則兄弟並就遠官犬馬之志不勝徬徨伏  
望聖慈矜憫特寢新命與臣一便地差遣所有勅牒  
臣未敢祇受已牒洪州寄軍資庫收管臣已交割本  
職公事與以次官員不敢於舊任處久住見迤邐前  
來聽候指揮謹具狀奏聞伏候勅旨

福州舉知泉州陳樞久不磨勘特與轉官狀  
右臣體訪得轄下知泉州尚書屯田員外郎陳樞不  
下磨勘文字已十五年中間曾遇覃恩改官其於綿  
歷歲月積累勞能則考課常法蓋未及之列於郎曹  
爲日已久方當朝廷崇尚廉素誠抑浮競之時樞獨  
安於冲靜所守如此况樞操履純篤出自天資治行

循良見於衆論自歷州縣及任淮南提點刑獄與今來再任泉州所至風績皆可稱紀伏乞特降指揮下審官東院檢會樞合該磨勘月日采其父不自陳特與優轉名曹以獎恬退臣忝備寄任不敢不言謹具狀奏聞伏候勅旨

福州奏乞在京主判閑慢曹局或近京一便郡狀

右臣輒露悃悃仰干旒袞臣母老多病見居京師臣任福州臣弟布任廣州相去皆數千里臣犬馬之志實不遑寧臣昨移福州之日曾乞哀憐改授近地尋

奉朝旨不允不敢再請臣既到任屬所部之內寇孽遺類往往尚聚山谷居人未寧遠近疑駭而州之屬邑又有出於早饑之後臣於此時正當竭其駑鈍復不敢以私計自陳自去冬及今春以來上賴朝廷威德蟻聚餘寇悉又殄除田疇之間連獲登稔今山海清謐千里晏然里閭相安粟米豐羨臣於所部乃無一事可以自効况臣到任今年八月已及一年遠去庭闈爲日已久晨昏之戀誼難苟止則臣可以乞恩實在今日伏見朝廷至仁比來羣臣之中有欲便於養親者並蒙聽許况臣母子各已白首兄弟二人皆

任遠地今臣於官守又無可以驅馳之事伏望聖慈  
憫惻以臣老母見在京師與臣一在京主判閒慢曹  
局差遣或就移近京一便郡庶便親養臣雖糜殞曷  
報聖恩臣不任惶懼戰汗激切屏營之至

移明州乞至京迎侍赴任狀

右臣昨以老母在京而臣知福州臣弟布知廣州相  
去各數千里幸臣所部之內盜賊殄除年穀豐稔臣  
於守官既無可驅馳之事而臣到任已及一年遠去  
庭闈爲日已久奏乞聖慈哀憐以臣老母見在京師  
與臣一在京主判閒慢曹局差遣或移臣近京一便

郡庶便親養尋准中書劄子已降勅命差臣權判太  
常寺兼禮儀事奉聖旨仰臣交割職分公事訖發來  
赴闕臣遂起離前來至洪州覩進奏院報已差臣知  
明州伏念臣已奔馳在路屈指計日望至親側竊計  
臣老母之心聞臣之來倚門之望固已深切今母子  
垂欲相見而臣忽它改差遣晨昏之戀既未得伸迫  
急之誠惟知涕泗且臣母子各已白首臣母近歲多  
病臣弟布又知桂州私門之內長子二人皆違左右  
而臣於兄弟之內又最居長犬馬之志豈敢苟安况  
今所得明州足可迎侍臣不敢別有陳乞欲望出自聖

恩特賜矜憫許臣徑馬暫至京師迎侍老母赴任不敢別有住滯伏惟天地之德哀而憐之臣欲候授勅後陳此懇誠臣見在道路恐慮勅命附遞前來或致遲延須至便具奏請所貴早得指揮不致別有留滯臣見水路前去所有朝旨乞降至真州以來付臣謹具狀奏聞伏候勅旨

明州奏乞回避朱明之狀

伏爲本路提點刑獄朱明之是臣母之親堂弟牒明州檢到勅條竊慮合該回避須至奏聞者右謹具如前乞賜檢會如合該回避欲望聖慈念臣在外十有

一年已更六任幸遇非常之主職與內朝而自陛下即祚以來未得一親玉色人臣愛君惓惓希慕之心未能自棄爲日已久兼臣昨任福州已係遠地迎侍不得即今老母多病見在京師人子之義晨昏之戀固難苟止二者於臣之心實爲迫切如臣合當避親臣不敢陳乞在京差遣只乞對移陳蔡一郡許臣暫至京師迎侍老母赴任使臣仰得就日月之光俯得伸犬馬之養臣至孤至遠之迹抱此微誠如不自言誰當爲臣言者伏惟陛下天地父母哀而憐之出自聖慈特賜矜許臣不任臣子區區激切之情謹具狀



奏聞伏候勅旨

進奉元豐元年同天節功德疏狀

彌月開祥本周家之極盛千秋紀節繇唐室之寢昌  
矧屬熙朝寔標華旦是敢虔遵象教恭啓法筵傾率  
土之歡心祝後天之遐筭庶偕動植永賴生成

進奉元豐元年同天節銀狀

馭鳥之詩本商人之所自出生民之什原周室之所  
繇興矧屬休辰寔開令節生成之造雖難稱於大恩  
愛戴之心庶可將於薄物用祝乾坤之久永爲夷夏  
之依

卷三十三

八

一

進奉元豐二年同天節銀綃狀

人神祐助是開彌月之祥夷夏歸依方祝後天之筭  
前件物旅於庭實出自土毛仰晞北極之尊用將微  
意願固南山之壽永庇羣生

移知亳州乞至京迎侍赴任狀

右臣五月三十日伏奉勅命就差知亳州旣近輦轂  
又便庭闈仰荷天恩俯從人欲非臣淺薄所能報稱  
伏念臣前奏中具陳在外十有一年已更六任幸遇  
非常之主職與內朝而自陛下即祚以來未得一親  
玉色人臣愛君惓惓希慕之心未能自棄爲日已久

兼臣昨任福州已係遠地迎侍不得即今老母多病  
見在京師人子之誼晨昏之戀固難苟止二者於臣  
之分實爲迫切如臣合當避親臣不敢陳乞在京差  
遣只乞對移陳蔡一郡許臣暫至京師迎侍老母赴  
任使臣仰得就日月之光俯得伸犬馬之養今臣幸  
蒙恩詔移守亳州如臣所請况亳州去京不遠欲乞  
許臣暫至京師迎侍老母赴任臣見已交割訖發離  
前來所有回降朝旨乞降至泗州付臣謹具狀奏聞  
候勅旨





